

7 Januari 2018

Ditangkap kerana dadah

DITANGKAP KERANA DADAH

MODEL dan pelakon popular Jennifer Dunn, 28, mengejutkan industri hiburan apabila ditangkap positif dadah jenis syabu di kediamannya di Bangka, Jakarta baru-baru ini. Dia menjadi artis pertama yang membuka lembaran tahun baharu dalam kes berkaitan dadah.

Merupakan kali ketiga disabitkan kes yang sama sejak 2005 dan 2009, nampaknya dia belum serik. Malah dia turut menyatakan alasan mengambil barang terlarang tersebut semata-mata ingin menenteramkan hatinya.

"Setelah menjalani ujian air kencing, hasilnya Jennifer positif menggunakan *methamphetamine*

atau syabu dan sekarang dia berada dalam tahanan pihak polis untuk beberapa ketika," ujar Kabid Humas dari balai polis Metro Jaya, Jakarta.

Ketika berada di hadapan wartawan, artis yang mengenakan seragam tahanan berwarna oren ini sempat menyampaikan permohonan maaf dengan tenang.

"Maaf semua, buat media dan seluruh keluarga, saya menyesal di atas semua ini. Sudah, itu sahaja," tuturnya yang ditemui di hadapan balai polis.

Penangkapan itu juga rupanya sudah diketahui oleh suaminya yang merupakan usahawan terkenal, Faisal Harris. Namun hingga kini, pihak Jennifer belum membiayai peguam untuk menangani kes tersebut.

Berbeza dengan penangkapan kes dadah yang kebanyakannya terlihat sedih, wanita ini nampak santai dan masih mesra ketika berhadapan dengan kamera. Malah dia juga sempat melambaikan tangan ke arah pihak media. Tiada sedikit pun kelihatan penyesalan dari raut wajahnya.

Sepanjang 2017 yang lalu, pihak polis tidak sunyi daripada menangkap artis yang terlibat

dengan dadah. Terdapat tujuh orang selebriti yang menghadapi tuduhan penyalahgunaan dadah pada tahun lalu. Antaranya Pretty Asmara, Ammar Soni, Ridho Rhoma, Ello, Iwa K, Tora Sudiro dan Tio Pakusadewo.

Kes penangkapan Jennifer ternyata turut mendapat maklum balas rakan artis antaranya Nikita Marzani. Kebanyakannya menganggap perkara tersebut adalah karma di atas kesilapan Jennifer yang telah merebut Faisal Haris daripada isterinya, Sarita Abdul Mukti.

"Dia sudah menyakiti hati Sarita dan anak-anaknya dahulu. Nah sekarang Allah telah pun membalas semua perbuatannya. Sungguh cepat balasannya itu," ujar Nikita Mirzani.

